

## Kurŏ Fesiya Od

### *Od Uyu Irouya*

<sup>1</sup> Jesus Kristus nē kurŏ fesiya od, are erēb kaisā bagai wō youf anī, Negurem yogon ferfer ifelnēdiyof nigin Jesus ifenen. Jesus ī, yogon ferfer Jon od anī keleī youf nigin, yogon engel Jon bun sur fen. <sup>2</sup> Jonem erēb erēb ganān ī ilen anī kurŏ falaisif, are Negur nē od ado, Jesus Kristus nē od. <sup>3</sup> Taka ī profet od enei iwesef are ī el fiyek, agef fen, idi anī karī de fen, erēb anī bun itoton anī waud bun dinof anidi el fedif, ere nigin, sain mogo dodolef.

### *Jon Sios Sewen Bun Yogon Aanya Sur Fen*

<sup>4</sup> Aya Jon,

Asia provins bun sios sewen bun pas enei atotof.

Negur ī gama ibodok, kulu ibodon, dumen isiy-ouf bunem, uur sewen yogon king nē sia wagen difaref bunem ado, <sup>5</sup> Jesus Kristus ī Negur nē od el fe dōf wogō yedig, ī tamo gare den bun tamal uyulil kel turī fiyen, tenebur king ganān neid mudur ī bunem, wau ifenēya ado wau inosiya ā bun isif.

Jesus ī ada nigin wau laaf fen, yogon naud bunem, ada neda mosor bun tamal yalelnadan.

<sup>6</sup> Agef fen, ī ada yogon Tama Negur aruna yaleya nigin, in tano ado in pris inodan. Ī bun fula fiya medeīya ado megeir gai gai ibodkalauf! Momoi.

<sup>7</sup> Log, ī lalo bunem isif.

Age fe di, meleid ganan ĩ dilouf,  
idi ĩ gilĭ difen anidig dilouf.

Age fe di, tamo kayau tenebur ein ganan ĩ  
nigin waud gudũ fouf.

Are agef bagai wō youf! Momoi.

<sup>8</sup> Odug Negur irok, “Aya uyulil ado idikeleya,  
aya gama abodok, kulu abodon, dumen asiyouf,  
aya saa ilun nē kusī tamo guri afeid uyu aroudig  
anī.”

### *Taka ĩ Tamo Naal Gen*

<sup>9</sup> Aya Jon, āgenei tureī, aya, Jesus bun darau,  
Negur nē tano ado, feseya sā ifareya, ā geid  
taledig, aya Negur nē od ado Jesus nē od wogō  
aun nigin, Patmos nuyo bun abodon. <sup>10</sup> Odug  
nē naa bun, aya Awa Uur namen abod ken, aya  
dumeun ait odug taur gen wō ye mog, karī aun.  
<sup>11</sup> Ait iron, “Ereb ō ulef anī, buk kori fiya bun utot  
fen, sios sewen bun sur wediyouf, oun Efesus,  
Smerna, Pergamum, Taiataira, Sardis, Filadelfia  
ado, Laodisia.”

<sup>12</sup> Aya ait wogō fiyan anī ileya nigin falei aun.  
Aya falei aul fen, lam nē gol tutur sewen ailedin.

<sup>13</sup> Lam tutur anī atun, aib taka “tamo naal gen”  
kolos meluk ifonũ di, yen isilen ado, let gol akor  
gu fen anī ifaren. <sup>14</sup> In mudur ado fatiya, sipsip  
siwi lalau, saa lalo lalau gen, yogon mala are yā  
mala fitotoleya gen. <sup>15</sup> Yogon ye are bras yā malan  
ifalegeya medeīya gen, in ait are naan uhuhuya  
gen. <sup>16</sup> Yogon ima biyalē barisa sewen iroun, agef  
fen, in awa bun tamal, dimig bala waila si sitakā

---

\* **1:13:** Daniel 7:13

wō yen. Yogon nawa are gaa ririya gen medeĩ yen.

<sup>17</sup> Aya ĩ ail fen, aya ĩ ye gariyan kubũ au, laa gen ainen. Age afe di, ĩ ima biyalē aya teteun ino fen, iron, “Ō to kumĩ wo. Aya gariya, aya idikeleya.

<sup>18</sup> Aya mata ibodōya nē, aya laa fiyan, anĩ ere, uleyaf, aya gai gai mata abodkalauf! Aya laa nē ado Hades nē ki aroudif.

<sup>19</sup> “Anĩ nigin, ereb ō ulen, ereb gama ibodok, ereb dumen wō youf anĩ utot. <sup>20</sup> Barisa sewen aya imau biyalē ulen ado, lam nē gol tutur sewen ulen anĩ nē waa nē gariya, are eig fiya: Barisa sewen are sios sewen neid engel, lam nē tutur sewen are sios sewen.

## 2

### *Efesus Sios Bun Od Ilef*

<sup>1</sup> “Efesus sios nē engel bun utot:

Od enei are, ĩ barisa sewen ima biyalē irou mog, sewen gol lam tutur difaren atun iyok ilen nē od: <sup>2</sup> Ereb ō ago wof, are aya keleĩ, ogon kabĩ total yaleya ado ogon feseya sã ifareya anĩ. Aya keleĩ, ō tamo sesen to loloum weid fen, idi dogo anĩ aposel dedig, anĩ ere, aposel sã anidi es wiyeid fen, idi neid idegēya anĩ ulen. <sup>3</sup> Ō total ufar fen, neu yanau nigin morō faali won, anĩ ere, ō to fō yon.

<sup>4</sup> Anĩ ere, aya ō nigin od enei ado: Ō uruwa aya nigin waũ laa fen anĩ utoron. <sup>5</sup> Anĩ nigin, ō nainenem kubũ won anĩ kisi wo! Falei wo fen, ereb uruwa agon anĩ agouf. Ō to falei wouf are, aya ō gein asi fen, ogon lam tutur

ado yogon modoũ bun tamal alelauf. <sup>6</sup> Anĩ ere, tobonunã biya enei õ ado: Õ Nikolas dõ difiyek neid tobonuneid to oroyõdig, are ayag to oroudig.

<sup>7</sup> Taka ï weder adouf, utornëg len, ï Awa Uur sios irokenëdif anĩ karĩ youf. Aib ï kusĩ anĩ wal fouf, aya ï mata ifenëya në aa Negur në paradis bun ibodok anĩ bun tamal, yõya nigin yo afiyëf.

### *Smerna Sios Bun Od Ilef*

<sup>8</sup> “Smerna sios në engel bun utot:

Od enei are, ï gariya ado idikeleya, ï laaf fen, baban mata fã yen në od. <sup>9</sup> Ogon darau ado ogon maleg nigin aya keleĩ, anĩ ere, õ safina musei ado. Aya idi dogo nigin Juda tamo dedig, anĩ ere, idi Juda tamo sã, Satan në guru fiya anidi neid bou yũya od nigin keleĩ. <sup>10</sup> Ereb mogo õ darau ifonõf nigin to kumĩ wo. Aya õ arokonok, Satan ï mogo ã tunĩ kisi yeĩa nigin kalabus bun ineneĩf. Age fe di, ã naa ten darau walogouf. Õ laa bun dinenõfeg, ogon momoiya urou kafĩ walauf, ago di, aya õ mata në teter kurũ ayõf.

<sup>11</sup> Taka ï weder adouf, utornëg len, ï Awa Uur sios irokenëdif anĩ karĩ youf. Aib ï kusĩ anĩ wal fouf, namba tu në laa ï to daũ fiyëf.

### *Pergamum Sios Bun Od Ilef*

<sup>12</sup> “Pergamum sios në engel bun utot:

Od enei are, ï dimig bala waila si sitakã ado në od. <sup>13</sup> Õ ubodok në an aya keleĩ, an Satan në sia ibodok. Anĩ ere, õ neu yanau urou kafĩ welef. Antipas, neu dõ fiya biya, aya nigin

od wogō yedig, ĩ Satan ibodok nē āgenei taun an dukesin sain anī buneg, ō aya nigin ogon momoiya to folō welen.

<sup>14</sup> Anī ere, aya ō nigin od tunī ado: Ō tamo tunī an Balam nē keleī dirouf anidi ado, Balam ĩ Balak ifelnē di, Balak ĩ Israel tamo kayau yeid tū fiya nē meein ino fen, idegnēdi di, Israel idi saaf idegēya waitou bun sesewi difen anī dokon, noli tobonunā dinon. <sup>15</sup> Age fiya gen, ō aneg tunī Nikolas nē ifelnēya dirouf anidi ado. <sup>16</sup> Anī nigin, waū falei wo! Sāf are, aya kaisā bagai ō gein asi fen, neu sigorou nē dimig ado idi geid kusī auf.

<sup>17</sup> Taka ĩ weder adouf, utornēg len, ĩ Awa Uur sios irokenēdif anī karī youf. Aib ĩ kusī anī wal fouf, aya ĩ mana iminēyan ibodok tunī afenēf. Aya ĩ meein lalau takag, yana mata teten itoton anī afenēf. Aib ĩ anī yalef dogol yana anī keleī youf.

### *Taiataira Sios Bun Od Ilef*

<sup>18</sup> “Taiataira sios nē engel bun utot:

Od enei are Negur Naal nē od, yogon mala are yā mala fitotoleya gen, yogon ye are bras yā malan ifalegeya medeīya gen. <sup>19</sup> Aya keleī, ō ereb agof, ogon waū laa fiya ado momoiya, ogon aruna yaleya ado feseya sā ifareya. Aya keleī, ō uruwa bun ago won anī wal fiya gama ō agodig.

<sup>20</sup> Anī ere, aya ō nigin od enei ado: Ō kayau Jesebel, ĩ yogo nigin profet kayau yef anī, loloum wedig. ĩ yogon ifelnēya bunem neu ferfer idegnēdi di, idi noli tobonunā bun dile

fen, saaf idegēya waitou sesewi difen anī dōdig. <sup>21</sup> Aya ī yogon mosor nigin wau falei youf nigin sain afenen, anī ere, ī to orof. <sup>22</sup> Anī nigin, aya ī darau nē fatar bun ara ken, idi ī geid seseirā dinodig anidi, kayau anī nē naab nigin waud to falei youf are, aya idi darau fatuk bagai afenēdiyof. <sup>23</sup> Aya ī gere tar adenkesiyof. Age afe di, sios ganan, aya waud ado kisi es afedig anī keleī youf. Age afe fen, aya ā mugu mugu erēb erēb ā ago gef kilei, mala solo afeneīf. <sup>24</sup> Anī ere, aya ā tunī ganan Taiataira ufaregef anī arokeneik, ā kayau anī nē ifelnēya to uroug fen, Satan nē waa namen bagai dedig anī to kelein anī arokeneik (aya ā bun erēb morō taka to afeneīf). <sup>25</sup> Erēb ā urougef anī dogol urougef uleg mog, asiyouf.

<sup>26</sup> Aib ī kusī anī wal fe fen, neu oroya dōf ile, idikeleya bun ouf, aya ī teneub lo fediya nigin megeir afenēf.

<sup>27</sup> Ī ain manig nem ulum irokenēdiyof,

ī mis gen daū fedī di, urud falaisiyof,\*  
are aya neu Dei bunem megeir alen gen. <sup>28</sup> Aya ī bonimeī nē barisa kilokilog afenēf. <sup>29</sup> Taka ī weder adouf, utornēg len, ī Awa Uur sios irokenēdif anī karī youf.

### 3

#### *Sardis Sios Bun Od Ilef*

<sup>1</sup> “Sardis sios nē engel bun utot:

Od enei are, ī Negur nē uur sewen ado barisa sewen irouf anī nē od. Ō erēb agof, are aya

---

\* **2:27:** Sam 2:9

keleĩ. Ō mata ubodok dedig, anĩ ere, õ laa yon.  
<sup>2</sup> Fã wale! Ereb mogo laa fou fenẽ anĩ megeir  
 wenẽ, ere nigin, aya õ ereb agof are neu Negur  
 nẽ mala bun tutuk bagai sã ailef. <sup>3</sup> Anĩ nigin,  
 ereb õ walen, ereb õ karĩ won anĩ karĩ walauf.  
 Anĩ dõ wo fen, waũ falei wo. Ō to fã walouf  
 are, aya bẽ tamo gen asiyouf. Aya sain nanĩ be,  
 õ gein asiyouf anĩ, õ to keleĩ youf.

<sup>4</sup> Anĩ ere, õ, Sardis an tamo kayau tunĩ, idi  
 neid kolos amuyẽ fiya sã difaref anidi ado. Idi  
 kolos lalau difoun ken, aya geid mayõf, ere  
 nigin, idi kisi feleya bagai. <sup>5</sup> Aib ĩ kusĩ anĩ  
 wal fouf, ĩ idi gen kolos lalau ifonũf. Aya  
 yogon yana, mata ibodõya nẽ buk bun tamal  
 to alelauf, age afe fen, yogon yana neu Dei ado  
 yogon engel meleid bun kurõ afesiyouf. <sup>6</sup> Taka  
 ĩ weder adouf, utornẽg len, ĩ Awa Uur sios  
 irokenẽdif anĩ karĩ youf.

### *Filadelfia Sios Bun Od Ilef*

<sup>7</sup> “Filadelfia sios nẽ engel bun utot:

Od enei are, ĩ fateul bagai ado momoi nẽ  
 od, ĩ Dawid nẽ ki irouf. Ereb ĩ kã fef, taka  
 nem to inolalauf, agef fen, ereb ĩ inolelef, taka  
 nem to kã falauf. <sup>8</sup> Ō ereb agof, are aya keleĩ.  
 Ulef, aya, sukar kã feleya taka nem inoleleya  
 kisi felya sã anĩ, õ wagen anon. Aya keleĩ, õ  
 megeir naal bagai ado, anĩ ere, õ neu od dõ wo  
 fen, neu yanau to wa won. <sup>9</sup> Ulef, idi Satan nẽ  
 guru fiya namen temeleid, idi dogo nigin Juda  
 tamo dedig, anĩ ere, idi Juda tamo sã, idegẽya  
 tamo anĩ, ayam age afe di, idi disu, õ yẽ gariyan  
 kubũ de fen, aya õ nigin wau laa fedig anĩ idi

keleĩ youf. <sup>10</sup> Ō feseya sã ufarauf nigin neu od urou kafĩ welen anĩ nigin, ayag idi tenebur dibodok kisi fediya nigin teneub ganan bun darau isiyouf sain bun, aya ō ahaha ayōf.

<sup>11</sup> Aya kaisã bagai asiyouf. Ō ereb urouf anĩ kafĩ walauf, ago di, taka nem ogon kurũ fiya nē teter anĩ to yalouf. <sup>12</sup> Aib ĩ kusĩ anĩ wal fouf, aya, neu Negur nē tempel bun, ĩ monog tor atennēf. ĩ anĩ baban to bagai itorōf. Aya ĩ bun, neu Negur nē yana ado, neu Negur nē taun yana, Jerusalem mata, are saa ilun tamal neu Negur bunem isiyouf anĩ atotauf. Age afe fen, aya neu yanau matag ĩ bun atotauf. <sup>13</sup> Taka ĩ weder adouf, utornēg len, ĩ Awa Uur sios irokenēdif anĩ karĩ youf.

### *Laodisia Sios Bun Od Ilef*

<sup>14</sup> “Laodisia sios nē engel bun utot:

Od enei are Momoi Barikã nē od, ĩ dō fiya biya ado, momoi bagai Negur nē od wogō yedig, ĩ ereb ereb Negur inodin ganan nē gariya. <sup>15</sup> Ō ereb agof anĩ aya keleĩ, are ō medir sã, uruwag sã. Aya ō medir be, uruwa anĩ taka ubodok nigin orouf. <sup>16</sup> Anĩ nigin, ō laigog, medir sã, uruwag sã nigin, aya ō mogo awau bun tamal atigil arāyōf. <sup>17</sup> Ō urōdig, ‘Aya safina ganan kisi feleya, aya safina musei alen nigin, aya ereb taka to lau afedig,’ wodig. Anĩ ere, ō keleĩ sã, ō gai sane bagai, malalon ado, maleg, malã ifofakeleya ado, gemũ ubodok. <sup>18</sup> Aya ō arokonok, ō aya bun gol bagai, gol yã bun difalegen anĩ, ō safina ganan kisi feleya bagai wō



wouf nigin, na walouf, ō kolos lalaug ufonũ di, ogon gemũ mama dede wouf nigin na walouf, ō mala marasin malã bun uno fen, kelẽ walauf nigin na walouf.

<sup>19</sup> Aya idi nigin wau laa fedig anidi, aya ou afeid fen, tai afedidig. Anĩ nigin, kabĩ total wale fen, mosor utor ken, waũ falei wouf. <sup>20</sup> Lo weleg, aya bobogẽ afar fen, godu afef. Taka ĩ aitou karĩ ye fen, sukar kã fouf are, aya ĩ namen asi fen, ĩ ado saaf mãf, age afe di, ĩ aya ado saaf mãf.

<sup>21</sup> Aib ĩ kusĩ anĩ wal fouf, aya kusĩ wal afe fen, neu Dei nẽ king nẽ sia bun, neu Dei ado mabodok gen, ĩg neu king nẽ sia bun, aya ado mabodõf nigin yo afiyẽf. <sup>22</sup> Taka ĩ weder adouf, utornẽg len, ĩ Awa Ur sios irokenẽdif anĩ karĩ youf.”

## 4

### *King nẽ Sia Saa Ilun Ibodok*

<sup>1</sup> Anĩ bure fele di, aya kelẽ aulen, aya wageun an saa ilun nẽ sukar kã feleya ifar mog, ailen. Age afe fen, ait aya uyulil taur gen wogõ fiya di, karĩ aun are iron, “Ein use, ago di, ereb enei bure fele di, wõ youf anĩ, afelnõf.” <sup>2</sup> Kaisã bagai aya Awa Ur namen abodon, age afe fen, wageun an saa ilun king nẽ sia bun, aib taka ibodon anĩ ailen. <sup>3</sup> Agef fen, taka an ibodon are, lo fiya bun meein medeĩya jaspera ado meein giriya medeĩya konilian gen wõ yen. Walol taka, meein aarau mata age fiya medeĩya emeral gen sof fen, king nẽ sia anĩ kalilĩ fen. <sup>4</sup> King nẽ sia anĩ sirin, tuwenti-fo king

nē sia anim salili de fen, tuwenti-fo mudur adodo anī bun dibodon. Idi kolos lalau difoun ken, dogo neid mudureid bun king nē gol teter ado dibodon. <sup>5</sup> King nē sia bun kolimei filiya firagagaū fe sof fen, gurūya odug wō ye di, kolimei gudū yen. King nē sia wagen lam sewen futu redin, are Negur nē awa uur sewen anī. <sup>6</sup> Takag, king nē sia wagen, ereb taka maaī gen galas nem dinon anī, galas medeīya bagai age fiya ibodon.

Anī atun king nē sia salili fiya bun, ereb mata ibodōya aiwa adodo difaren. Idi meleid barikā, wagedin ado dumedineg. <sup>7</sup> Ereb mata ibodōya uyu ifaren are laion gen, anī dō fiya are bulmakau gen, anī dō fiya are nawa, tamo nawa gen, anī dō fiya are webi fatutu yef gen. <sup>8</sup> Ereb mata ibodōya aiwa adodo idi mugu mugu wayeid sigis ado fen, bouweid ganan bun meleid barikā, wayeid farumēg meleid ado. Bō ado gaa ado, idi eig yeya to folō difeledig:

“Fateul, fateul, fateul

are Odug Negur saa ilun nē kusī tamo guri feid  
uyu iroudig anī,

ī kulu ibodon, ī gama ibodok, ī dumen isiyouf.”

<sup>9</sup> Ereb sain ereb mata ibodōya idi, taka ī king nē sia bun ibod ken, mata faimud ibodkeleya anī bun, fula fiya medeīya, yana odug ado, de fiyēya difenēdig bun, <sup>10</sup> mudur adodo tuwenti-fo, ī king nē sia bun ibod mog, ī wagen kuku de fen, ī mata faimud ibodkeleya anī seli dalesedig. Idi king nē sia wagen dogo neid teter gō difel fen, dirōdig:

<sup>11</sup> “Nemā Odug Negur,

ō fula fiya medeīya, yana odug ado, megeir yaleya  
 kisi feleya bagai,  
 ere nigin, ō ereb ereb ganan ago di, wowā den,  
 ago fen, ogon oroya bunem idi unodi di,  
 age de difaref.”

## 5

### *Buk Kori Fiya Ado Sipsip Naal*

<sup>1</sup> Age de di, aya ī king nē sia bun ibodon anī  
 ima biyalē, buk kori fiya si sitakā itotoya ado  
 uris sewen nem itā de fen, sile fiyan anī ailen.

<sup>2</sup> Age afe fen, aya engel megeir ado taka ailen, ī  
 ait odugem iweig iron, “Aim uris eneidi narī feid  
 fen, buk kori fiya enei fara feleya kisi feleya?”

<sup>3</sup> Anī ere, saa ilun be, tenebur be, teneub farumen  
 tamal, taka nem buk kori fiya anī fara feleya be,  
 namen fele fiya kisi feleya sā. <sup>4</sup> Aya fatuk bagai  
 inā alen, ere nigin, taka nem buk kori fiya anī fara  
 feleya be, namen fele fiya kisi feleya to wō yen.

<sup>5</sup> Age afe di, mudur adodo takam aya irokanan,  
 “To inā wale! Ulef, Juda nē ibor bun tamal Laion,  
 Dawid nē Warei mogo kusī wal fen. Inim, sā buk  
 kori fiya anī yogon itāfiya uris sewen ado fara  
 falauf.”

<sup>6</sup> Age ye di, aya Sipsip Naal dukessin anī gen,  
 king nē sia ereb mata ibodōya aiwa adodo salili  
 difiyen ado, mudur adodo atun ifar mog, ailen. Ī  
 karat sewen ado mala sewen ado, mala sewen are  
 Negur nē awa uur sewen teneub ganan bun susur  
 fedin anidi. <sup>7</sup> Sipsip Naal ī isi fen, ī king nē sia bun  
 ibodon anī nē ima biyalē buk kori fiya anī yalen.

<sup>8</sup> Sain ī anī yalen, ereb mata ibodōya aiwa adodo,

mudur adodo tuwenti-fo geid, Sipsip Naal wagen kuku den. Idi mugu mugu harp\* ado beī gol nem kaau sumeī biya isokoseya ado guri difen, kaau sumeī biya are momoiya tamo kayau neid kosē.

<sup>9</sup> Age de fen, idi seg mata dalen:

“Ō buk kori fiya anī wale fen,  
     yogon itāfiya uris sewen anī fara feleya kisi  
     feleya bagai,  
 ere nigin, ō dinōkesi di,  
     ō ogon naud bunem  
     ibor ganan bun, od fire fire ganan bun, tamo  
     kayau ganan bun ado, teneub ganan bun,  
     Negur nē tamo kayau na waledin.

<sup>10</sup> Ō idi neda Negur aruna dalouf nigin, tano ado pris unenēdin,  
 ago di, idi teneub ganan lo fiya nigin mudur dibodōf.”

<sup>11</sup> Age de di, aya malau ara ken, engel musei bagai neid aiteid karī aun, idi tausen musei ado handred tausen musei wal fiya. Idi king nē sia, ereb mata ibodōya ado, mudur adodo salili difiyēdin. <sup>12</sup> Age de fen, idi aiteid odugem seg dalen:

“Sipsip Naal dukessin ī  
 megeir, safina, kisi biya, total, yana odug, fula fiya medeīya ado,  
 yana yaleseya yaleya kisi feleya bagai!”

<sup>13</sup> Agef fen, aya, ereb ereb ganan saa ilun difaref, tenebur difaref, teneub farumen difaref ado, maaī bun difaref, ereb ereb ganan anī namen mata difaref idi seg dale mog, karī aun:

---

\* **5:8:** Harp anī gita gen musik kodē dedig.

“Ī king nē sia bun ibodok ado Sipsip Naal bun,  
yana yaleseya, yana odug, fula fiya medeīya ado,  
megeir,  
gai gai ibodkalauf!”

<sup>14</sup> Ereb mata ibodōya aiwa adodo diron, “Momoi,”  
age de di, mudur adodo kuku de fen, yana dale-  
sen.

## 6

### *Ītāfiya Uris*

<sup>1</sup> Aya lo afe mog, Sipsip Naal Ītāfiya uris sewen  
anī uyulil fara fen. Age fe di, aya, ereb mata  
ibodōya aiwa adodo takam, ait kolimei ait gen  
bun eig ye mog, karī aun, “Usi!” <sup>2</sup> Aya lo afen,  
aya wageun an hos lalau taka ifaren. Tamo anī  
teten ibodon ĩ wi taka iron, ĩ kusī wal fiya nē  
teter ifenen, age fe di, ĩ hos bun kusī wal fe fen,  
kusī wal fediyouf nigin ilen.

<sup>3</sup> Sipsip Naal ĩ Ītāfiya uris uyulil dō fiya anī fara  
fen, age fe di, aya ereb mata ibodōya uyulil dō  
fiya anī eig ye mog, karī aun, “Usi!” <sup>4</sup> Age ye di,  
hos taka isin, are giriya bagai. Tamo anī teten  
ibodon ĩ, tenebur tamal malol yalel fen, tamo  
abob didenkesiyouf nigin megeir ifenen. Ī anī  
dimig odug ifenen.

<sup>5</sup> Sipsip Naal ĩ Ītāfiya uris anī dō fiya fara fen,  
age fe di, aya ereb mata ibodōya anī dō fiya anī eig  
ye mog, karī aun, “Usi!” Aya lo afen, aya wageun  
an hos karos taka ifaren. Tamo anī teten ibodon,  
yogon ima bun ĩ foi fiya nē safina iron. <sup>6</sup> Age  
fe di, aya ereb mata ibodōya aiwa adodo atun ait  
taka gen karī aun are iron, “Naa tekelei nē mala

solo wit bret tekelei yalouf, naa tekelei nē mala solo baali bret towo yalouf. Ago fen, oliv mouf ado wain to daū wo!”

<sup>7</sup> Sipsip Naal ī itāfiya uris anī dō fiya fara fen, age fe di, aya ereb mata ibodōya anī dō fiya anī eig ye mog, karī aun, “Usi!” <sup>8</sup> Aya lo afen, aya wageun an hos bailuya taka ifaren. Tamo anī teten ibodon ī yana Laa, age fe di, Hades ī degē degē fiyen. Idi tenebur tamo kayau aiwa adodo foi fiya atun taka anī, dimig nem, kadir nem, dagi odug nem ado, tenebur gaar kuī nem didenkesiyouf nigin megeir ifenēdin.

<sup>9</sup> Sipsip Naal ī itāfiya uris anī dō fiya fara fen, age fe di, aya idi Negur nē od dale fen, feseya sā od anī wogō de di, didenkesin anidi neid meleidkanon alta farumen ailedin. <sup>10</sup> Idi aiteid odugem diweig diron, “Ereb ereb ganan nē Odug, fateul fen momoi, ere sain bun bagai, ō tenebur tamo kayau es woid fen, idi amā didenamakesin nigin mala solo wenēdiyof?” <sup>11</sup> Age de di, idi mugu mugu kolos lalau meluk ifenēdin, agef fen, idi naal sain meluk tari de mog, dogo neid kabī tureid tar ado momoiya tamo kayau Negur igirnēdin ganan, idi age difedin gen didenkesiya kisi falauf nigin irokenēdin.

<sup>12</sup> Aya ī itāfiya uris anī dō fiya fara fel mog, ailen. Age fe di, mimī odug wō yen. Gaa gugum kel fen, wau gudū fiya nē gabar meme siwi nem iwaya gen karos kelen. Ogō oditekei naud giriya gen falei felen. <sup>13</sup> Age fe di, saa ilun barisa tenebur kuku ren, are aa fig faat dobi yau totolem yoū fe di, kuku redig gen age fen. <sup>14</sup> Saa, pepa kori

fiya gen iwaikelen, agef fen, arei ganan ado nuyo ganan, dogo neid modoũ ditoraran.

<sup>15</sup> Age fe di, tenebur nē king, tamo yeneid adodo, kusī mudur, safina musei adodo, megeir adodo ado, ferfer ganan ado tamo kafī fiya sã bun difaref ganan, kuren ado arei nē sa atun diminanan. <sup>16</sup> Idi arei ado sa diweig dirokenēdin, “Tetenaman kubũg fen, ĩ king nē sia bun ibodok anĩ nawa ado Sipsip Naal nē didi bun tamal unokolnamãg! <sup>17</sup> Ere nigin, idi neid didi nē naa odug mogo isin, anĩ nigin, aim ifareya kisi feleya?”

## 7

### *Israel Tamo Kayau 144,000 Bun Uris Dinon*

<sup>1</sup> Anĩ bure fele di, aya engel aiwa adodo, teneub idikeleya uyu uyu aiwa adodo bun, difar fen, teneub uyu uyu aiwa adodo nē yau, yau takam teneub be, maaĩ be, aa taka bun to fũ foug nigin kafī difel mog, ailen. <sup>2</sup> Age afe fen, aya engel taka mata ibodõya Negur nē ĩtãfiya uris ado gaa iseyan ise mog, ailen. ĩ engel aiwa adodo teneub ado maaĩ daũ fiya nē megeir ifenēdin anidi, ait odugem iweig irokenēdin: <sup>3</sup> “Ã teneub be, maaĩ be, aa taka fau mog to daũg, amã neda Negur nē ferfer demeid bun ĩtãfiya uris manol len.” <sup>4</sup> Age ye di, aya idi ĩtãfiya nē uris dinon anidi ganĩ anĩ karĩ aun, are 144,000 idi Israel ibor ganan bun temeleid.

<sup>5</sup> Juda nē ibor bun tamal 12,000 are ĩtãfiya uris dinon,  
Ruben nē ibor bun tamal are 12,000,

Gad nē ibor bun tamal are 12,000,  
<sup>6</sup> Aser nē ibor bun tamal are 12,000,  
 Naftali nē ibor bun tamal are 12,000,  
 Manase nē ibor bun tamal are 12,000,  
<sup>7</sup> Simeon nē ibor bun tamal are 12,000,  
 Lewi nē ibor bun tamal are 12,000,  
 Isakar nē ibor bun tamal are 12,000,  
<sup>8</sup> Sebulun nē ibor bun tamal are 12,000,  
 Josef nē ibor bun tamal are 12,000,  
 Benjamin nē ibor bun tamal are 12,000.

*Guru Fiya Mala Odug Kolos Lalau Meluk Difo-  
 nundin*

<sup>9</sup> Anī bure fele di, aya lo afen, aya wageun an guru fiya mala odug bagai, taka nem iwesleya kisi feleya sã, idi teneub ganan bun, ibor ganan bun, tamo kayau ganan bun ado, od fire fire ganan bun temeleid, idi king nē sia wagen ado Sipsip Naal wagen difaren. Idi kolos lalau meluk difoun ken, pam boge anã boge gen anī imedim guri difen.

<sup>10</sup> Age de fen, idi aiteid odugem diweig diron:

“Kel gei fiya are  
 neda Negur king nē sia bun ibodok ado  
 Sipsip Naal nē.”

<sup>11</sup> Engel ganan, king nē sia ado, mudur adodo ado, ereb mata ibodōya aiwa adodo salili difiyeīd difar fen, king nē sia wagen neweid lē kuku de fen, Negur yana dalesen. <sup>12</sup> Idi diron:

“Mmoi!  
 Yana yaleseya, fula fiya medeīya,  
 kisi biya, de fiyēya, yana odug,  
 megeir ado, totol are  
 neda Negur bun gai gai ibodkalauf.  
 Mmoi!”



<sup>13</sup> Age de di, mudur adodo takam aya to fiyan, “Idi eneidi kolos lalau meluk difonun are nanim-dim, idi nainenem disin?”

<sup>14</sup> Aya ã arokenen, “Tamo biya, õ keleĩ.”

Age au di, ã irokanan, “Eneidi are darau, kafĩ fiya odug bun temeleid disin. Idi dogo neid kolos meluk Sipsip Naal naud nem kulo dife di, lalaun.

<sup>15</sup> Anĩ nigin,

“idi Negur nẽ king nẽ sia wagen difar fen,  
yogon tempel bun gaa ado bõ ganan aruna  
daledig.

Age dife di, ã king nẽ sia bun ibodok anim yogon  
salafat biraraũ fe fen, kerũ fediyouf.

<sup>16</sup> Idi baban to naũ fediyouf,  
to naan ail fediyouf.

Gaam be, ereb uruwa adom,  
baban to isaĩnẽdiyouf.

<sup>17</sup> Ere nigin, Sipsip Naal king nẽ sia atun ifaref  
inim, dogo neid lo fiya tamo ibodõf.

Ï idi mata ibodõya nẽ naan warur bun gurif  
iroulediyouf.

Age fe di, Negur ã idi meleid bun tamal maruid  
ganan waĩ falauf.”

## 8

### *Ïtãfiya Uris Namba Sewen Ado Aa Gaula Sumeĩ Biya Nẽ Gol Beĩ*

<sup>1</sup> Sain Sipsip Naal Ïtãfiya uris namba sewen anĩ  
fara fele di, saa ilun hap aua age fiya karasã sã  
mutũ bagai yenen.

<sup>2</sup> Age fe di, aya engel sewen Negur wagen  
difaren anidi, taur sewen ifeneĩd mog, ailen.

<sup>3</sup> Engel taka ĩ, aa gaula sumeĩ biya nē gol beĩ ado isi, alta bun ifaren. ĩ aa gaula sumeĩ biya musei, momoiya tamo kayau ganan neid kosē ado, king nē sia wagen gol alta bun sesewi foug nigin difenen. <sup>4</sup> Aa gaula sumeĩ biya nē kaau, momoiya tamo kayau neid kosē ado, engel ima bun tamal Negur wagen iselen. <sup>5</sup> Agef fen, engel aa gaula sumeĩ biya nē beĩ yale, alta bun tamal yā ife fen, tenebur iran, age fe di, kolimei gudūya, gurūya odug, kolimei filiya ado, mimĩ wō yen.

### *Taur*

<sup>6</sup> Age fe di, engel sewen taur sewen ado, taur wese fiya nigin dodok difen.

<sup>7</sup> Engel uyulil yogon taur wese fe di, uyē ais, yā naud ado bagu fen, isi di, tenebur iraran, age fe di, teneub tekelei faraf towo fiya gen anĩ taka adok isaikelen, aa ganan faraf towo fiya gen anĩ taka adok isaikelen, agef fen, fisir mata ganan isasaikelen.

<sup>8</sup> Engel uyu wō yen anĩ dō fiya yogon taur wese fe di, ereb arei odug gen yā fitotoleya ado maaĩwō iran. Maaĩ faraf towo fiya gen anĩ taka, naud falei felen, <sup>9</sup> maaĩwō ereb ereb mata ibodōya faraf towo fiya gen anĩ taka gare den, agef fen, waag ganan faraf towo fiya gen anĩ taka daũ felen.

<sup>10</sup> Anĩ dō fiya engel taka yogon taur wese fe di, barisa odug yal gen kaur fen, saa ilunem, naan faraf towo fiya gen anĩ taka bun ado, naan warur anidi bun kubū yen. <sup>11</sup> Barisa anĩ nē yana Dirikeĩ. Naan faraf towo fiya gen anĩ taka dirikeĩ kele di, tamo kayau musei, naan dirikeĩ kelen anĩ bunem gare den.

<sup>12</sup> Anĩ dō fiya engel taka yogon taur wese fe di, gaa faraf towo fiya gen anĩ taka, ogō faraf towo fiya gen anĩ taka ado, barisa faraf towo fiya gen anĩ taka yū di, idi ganan faraf towo fiya gen anĩ taka gugum kelen. Naa faraf towo fiya gen anĩ taka lalan sa kelen, agef fen, bō faraf towo fiya gen anĩ takag age fen.

<sup>13</sup> Aya lo afe mog, aya webi taka karĩ au mog, ilun fatutu ye fen, ait odugem iweig iron, “Malalon! Malalon! Malalon tenebur dibodok anidi bun, ere nigin, engel towog mogo taur ait wese difou fenē!”

## 9

<sup>1</sup> Engel anĩ dō fiya engel taka yogon taur wese fe di, aya barisa taka saa ilunem tenebur kubū yen anĩ ailen. Barisa are ku isil idīya sã nē ki anĩ ifenen. <sup>2</sup> Ī ku isil idīya sã anĩ kã fele di, kaau are yā odug kū fiya modoū bun tamal gen fã yen. Ku isil idīya sã bun tamal kaau anim, gaa ado saa gugum kelen. <sup>3</sup> Age fe di, kaau namen tamal, totobi tenebur wowã den, are idi neid megeir, tenebur ābei neid megeir gen ifenēdin. <sup>4</sup> Idi tenebur tamal fisir be, ereb aayū be, aa taka to daū difouf, anĩ ere, tamo kayau idi Negur nē uris demeid bun sã anidi dogol daū difediyouf nigin irokenēdin. <sup>5</sup> Idi tamo idenkesiya nē megeir to ifenēdin, anĩ ere, idi ogō faif bun darau dogol difenēdiyof nigin megeir ifenēdin. Age fe di, idi neid darau arar, ābei tamo garū fe di, darau arar iledig gen. <sup>6</sup> Naa anidi bun tamo laa dimirēf, anĩ ere, to dilouf. Idi laa orodiyof, anĩ ere, laa to gurug fediyof.

<sup>7</sup> Totobi are hos kusī bun ileyā nē gegen. Idi neid mudureid bun, ereb gol teter gen kurū difedin, idi neid neweid tamo neweid gen. <sup>8</sup> Nedi fatiyeid kayau fatiyeid gen, agef fen, waileid are laion waila gen. <sup>9</sup> Nedi siot kapa are ain nē siot kapa gen, agef fen, idi neid wayeid furūya are hos musei ado karis kusī bun gududu de fen, gou redig gen. <sup>10</sup> Idi ibud ado waileid ābei neid gen, agef fen, idi ibud nem ogō faif bun tamo kayau darau difenēdiyof nigin megeir adon. <sup>11</sup> Idi uyu iroukenēdiya nē king ado, are ku isil idīya sā nē engel, in yana Hibru od nem are Abadon, Grik od nem are Apolion.\*

<sup>12</sup> Morō odug uyulil anī bure felen, age fe di, morō odug uru are fau disif.

<sup>13</sup> Engel namba sigis anī yogon taur wese fe di, aya ait taka gol alta Negur wagen ifaref anī nē karat aiwa adodo bunem wowā yeid mog, karī aun. <sup>14</sup> Ait are engel namba sigis taur ado anī irokenen, “Engel aiwa adodo Yufretis naan odug bun difofan anidi fara woidle.” <sup>15</sup> Age ye di, engel aiwa adodo are aua, naa, ogō, yar enei bun bagai, tamo teneub ganān bun fara fiya towo anī taka adok didenkesiyof nigin, dodok fedin anī folō feledin. <sup>16</sup> Hos teten kusī bun ileyā nē tamo anidi are 200 milion. Aya dogo neid namba karī aun.

<sup>17</sup> Aya malau seleulā kurā fiya bun, hos adodo tamo hos tetedin dibodon anidi eig fiya ailedin: Idi neid siot kapa are, yā giriya gen, maaī gegē gen ado, bailuya salfa gen. Hos mudureid are, laion mudureid gen, agef fen, idi eweid bunem

\* **9:11:** Abadon ado Apolion nē gariya, Daū Fiya Tamo.

yā, kaau ado, salfa wowā yen. <sup>18</sup> Tamo tenebur ganan faraf towo fiya gen anī taka ganan, sane towo anim, yā, kaau ado, salfa idi eweid bun wowā yen anim didenkesin. <sup>19</sup> Hos idi neid megeir are eweid bun ado ibud bun ibodon, ere nigin, idi neid ibud are gogour gen fen, mudureid anim tamo kayau darau difenēdidig.

<sup>20</sup> Tamo kayau tunī ganan, sane eneidim to didenkesin anidi, idi imedim dinon anī to ditor ken, waud to falei yen. Idi kaa sesen yeneid yaleseya to ditor ken, gol, silwa, bras, meein ado, aa nē idegēya waitou, are lo fiya, kariya be, iyōya kisi felya sã anidi yeneid yaleseya itorōya sã. <sup>21</sup> Idi tamo yukesiya, dogo neid idegēya kosēya, dogo neid noli tobonunã be, dogo neid bē yaleya tobonunã nigineg waud to falei yen.

## 10

### *Engel Ado Buk Kori Fiya Naal*

<sup>1</sup> Anī bure fele di, aya engel megeir ado taka saa ilunem isi mog, ailen. Ī lalom silef fen, yogon mudur bun walol ado. In nawa gaa gen, agef fen, yogon ye are tor yā bobo reya gen. <sup>2</sup> Ī buk kori fiya naal taka ima bun fara feleya iroun. Ī ye biyalē maaī bun iten ken, ye kilē teneub bun itenen. <sup>3</sup> Agef fen, ĩ laion ninirã ye gen ken, ait odugem iweig iron. Sain ĩ iwegin, kolimei gudūya sewen neid aiteid wogō den. <sup>4</sup> Kolimei gudūya sewen wogō de di, aya anī atotau fenē age afen, anī ere, aya ait taka saa ilunem eig ye mog, karī aun, “Ereb kolimei gudūya sewen wogō den anī bun ĩtãfiya uris uno fen, ò to utotauf.”

<sup>5</sup> Age ye di, engel maañ bun ado teneub bun ifar mog ailen, are ima biyalẽ saa ilun yalesen.

<sup>6</sup> Agef fen, engel ĩ, Negur gai mata ibodkeleya, saa ado ereb ereb ganan anĩ bun difaref, teneub ado ereb ereb ganan anĩ bun difaref, maañ ado ereb ereb ganan anĩ bun difaref inodin anĩ yana nem, wau kuturol fen, iron, “Foiya nẽ sain sã!  
<sup>7</sup> Anĩ ere, engel namba sewen anĩ yogon taur wese fouf naa bun, Negur nẽ waa, ĩ yogon ferfer profet irokenẽdin kilei, agef wõ ye kisi falauf.”

<sup>8</sup> Anĩ bure fele di, ait saa ilunem aya irokana di, karĩ aun, are baban irokanan, “Ule, engel maañ ado teneub bun ifaref anĩ ima bun, buk kori fiya fara feleya irouf anĩ wale,” yen.

<sup>9</sup> Age ye di, aya engel garan ele fen, buk kori fiya naal anĩ ifanauf nigin arokenen. ĩ aya irokanan, “Are wale wõ wakas. Are õ namẽ bun dirikeĩ youf, anĩ ere, õ awã bun are nin te gen dan yõf.”

<sup>10</sup> Aya buk kori fiya naal engel ima bun tamal ale on. Are neu awau bun nin te gen dan fiyan, anĩ ere, aya akalaisile di, nameun dirikeĩ fiyan. <sup>11</sup> Age afe di, idi aya dirokanan, “Õ tamo kayau musei, teneub musei, od musei ado, king musei nigin, baban profet od wogõ wouf.”

## 11

### *Od Megeir Fiya Nẽ Isennẽya Tamo Uru*

<sup>1</sup> Aya sisi fiya nẽ tibog gen werĩ taka ifana fen, irokanan, “Ule fen, Negur nẽ tempel ado alta sisi wo fen, Negur yana an ganim dalesedig anĩ uwes.

<sup>2</sup> Anĩ ere, tempel fofomala anĩ utor. Are to sisi wo, ere nigin, are haiden ifenẽdin. Idi foti-tu

ogō bun taun fateul anī lai difalauf. <sup>3</sup> Age dife di, aya neu od megeir fiya nē isennēya tamo uru megeir afenēdi di, idi 1,260 naa anidi bun wau gudū fiya nē gabar difoun ken, profet od kurō difesiyouf.” <sup>4</sup> Eneidi are oliv aa uru ado lam tutur uru, tenebur nē Odug wagen difaref. <sup>5</sup> Takam idi darau ifenēdiya nigin age foug are, yā eweid bunem wō ye fen, idi neid kiwai tar oditekei yakur falauf. Aibem taka idi darau ifenēdiyou fenē age foug, are agef laa foug bagai. <sup>6</sup> Tamo eneidi saa katī feleya nē megeir ado nigin, idi profet od wogō douf sain, uyē to isiyouf, agef fen, idi naan falei fe di, naud wōya nigin megeir ado fen, ereb sain orodif kilei, idi ereb sane fire fire bunem teneub yūya nē megeir ado.

<sup>7</sup> Idi Negur nē od kurō fesiya bure difele di, gaar kuī anī ku isil idīya sā bunem ulō yeis fen, idi geid kusī de, wal feid fen, idenkesiyouf. <sup>8</sup> Idi neid bouweid buru taun odug anī nē naabur yenēf, taun are yaab od bunem Sodom ado Isip dedig, an nedi Odugeg aa tetek bun dukesin. <sup>9</sup> Tamo kayau fire fire bun tamal, ibor fire fire bun tamal, od fire fire bun tamal ado, teneub fire fire bun tamal, tamo kayau idi, naa towo ado naa taka atun bun, nedi bouweid buru dile fen, mumā difoug nigin to yo douf. <sup>10</sup> Tamo kayau tenebur dibodok anidi, idi nigin waud al fe di, sifa dino fen, idi abob safina ege luwa difenēf, ere nigin, profet uru eneidi, idi tenebur dibodok anidi darau difenēdin.

<sup>11</sup> Anī ere, naa towo ado naa taka atun anī bure fele di, mata neseya nē uur Negur bunem idi namedin ilen, age fe di, idi fafā de difaren. Age dife di, idi diledin are kumī tererē den.

<sup>12</sup> Anĩ bure fele di, idi saa ilunem ait odug eig ye irokeneĩd mog, karĩ den, “Ilun ein useg,” yen. Age ye di, idi neid kiwai lo difeid mog, idi lalo bunem saa ilun diselen.

<sup>13</sup> Sain anĩ bun bagai, mimĩ odug wõ ye di, taun anĩ bun ten tekelei adok daũ felen. Sewen tausen tamo kayau mimĩ anim idenkesin. Age fe di, idi gareya sã are kumĩ tererẽ de fen, saa ilun nẽ Negur fula fiya medeĩya difenen.

<sup>14</sup> Morõ odug uyu ilen anĩ dõ fiya bure fele di, morõ odug anĩ dõ fiya mogo melsã bagai isiyou fenẽ.

*Engel Taur Namba Sewen Anĩ Wese Fen*

<sup>15</sup> Engel namba sewen anĩ yogon taur wese fe di, saa ilun ait odug wowã ye fen, diron:

“Tenebur nẽ tano are, neda Odug ado yogon  
Kristus nẽ tano wõ yen,  
age fe di, ĩ gai gai lo fiya nigin anĩ nẽ mudur  
ibodõf.”

<sup>16</sup> Age de di, tuwenti-fo mudur adodo, Negur wagen dogo neid king nẽ sia bun dibodon wageidlẽ kuku de fen, Negur yana dales, <sup>17</sup> diron:

“Odug Negur saa ilun nẽ kusĩ tamo guri weid uyu  
uroudig anĩ,  
õ gama ubodok, kulu ubodon, amã õ de  
mayok,  
ere nigin, õ ogon megeir odug wale fen,  
lo fiya nigin king wõ won.

<sup>18</sup> Teneub ganan waud sanen, anĩ ere, ogon didi mogo isin.

Tamo gare den anĩ es fediya sain mogo isin,  
ogon ferfer profet, ogon tamo kayau fateul  
ado,



idi ogon yanã nigin anini den anidi nanaal ado  
 odudug,  
 mala solo ifenēdiya sain mogo isin,  
 idi teneub daũ difef anidi daũ fediya sain mogo  
 isin.”

<sup>19</sup> Anĩ bure fele di, Negur nē tempel saa ilun kã fele di, yogon tempel namen yogon bar itenēya nē bogis wõ yen. Age fe di, kolimei filiya, gurūya odug, kolimei gudūya, mimĩ ado, uyē ais ado odug wõ yen.

## 12

### *Kayau Ado Gogour Odug*

<sup>1</sup> Uris odug fire bagai saa ilun wõ yen. Kayau taka gaa ifoun kel fen, yogon ye farumen ogolam ado, yogon mudur bun barisa tuwelf nē teter kurū fen. <sup>2</sup> Ī bou ado fen, kesu gō fiya sain melsã di, darau nigin kaĩ yen. <sup>3</sup> Age fe di, uris takag saa ilun wõ yen. Gogour giriya odug bagai mudur sewen, karat ten ado, teter sewen mudur sewen bun difaren ado wõ yen. <sup>4</sup> Yogon ibum barisa fara fiya towo anĩ taka saa ilun waĩf, tenebur iraran. Gogour odug anĩ kayau kesu gō fiya sain melsã anĩ wagen ifaren, are ĩ yogon kesu gō falaisi di, itobouf nigin age fen. <sup>5</sup> Kayau kesu taka gō fen, are kesu monog, ĩ teneub ganam ain manig nem ulum irokenēdiyof. Age fe di, yogon kesu kaisã bagai gurar fe yale, Negur ado yogon king nē sia wagen irouselen. <sup>6</sup> Kayau, Negurem modoũ dodok fenen nē gerere tuan iya ilen, an ĩ Negurem 1,260 naa kulatun fiyēf.

<sup>7</sup> Agef fen, saa ilun kusĩ wõ yen. Maikel yogon engel geid, gogour odug geid kusĩ den. Age fe di, gogour odug, yogon engel geid, abag idi geid kusĩ den. <sup>8</sup> Anĩ ere, gogour odug in engel geid, idi neid megeir kisi feleya sã, anĩ nigin, idi saa ilun nedi modoũ ditoron. <sup>9</sup> Gogour odug bagai are dale diran, are gogour kulu tamal bagai, anĩ Devil be, Satan dedig, ĩ teneub ganan idegnëdidig. ĩ tenebur dale dira ken, yogon engeleg ĩ geid diraran.

<sup>10</sup> Age fe di, aya saa ilunem ait odug eig ye mog, karĩ aun:

“Gama neda Negur nẽ kel yaleya, megeir, tano ado,  
 yogon Kristus nẽ total mogo isin.  
 Ere nigin, ĩ neda turada tar bouweid yũya od irõdig,  
 ĩ neda Negur wagen, gaa ado bõ, idi bouweid yũya od irõdig,  
 are mogo dale diran.

<sup>11</sup> Idi Sipsip Naal naud bunem ado,  
 dogo neid Jesus nigin od wogõya bunem  
 ĩ wal difiyen.

Idi dogo mata ibodõya nigin kisi fatuk to dale fen,  
 laa uyu ditoron.

<sup>12</sup> Anĩ nigin, saa ilun õ ado,  
 an ufaregef ã, wauĩ kulĩ ye!

Anĩ ere, teneub ado maaĩ ã, meleĩlon ado,  
 ere nigin, Satan mogo ã bun isilen!

Seye ĩ bun isokosef,  
 ere nigin, ĩ keleĩ, yogon sain mogo modegef.”

<sup>13</sup> Sain gogour odug ĩ tenebur diran anĩ ile fen, ĩ kayau kesu monog gõ fen anĩ iruf ilen.

<sup>14</sup> Kayau are, gerere tuan modoũ ĩ nigin dodok fenen anĩ bun fatutu ye ilauf nigin, webi odug nē waye uru difenen, an kayau gogour odug anim to ironēf nigin, yar towo ado yar taka atun, kayau anĩ kulatun difiyēf. <sup>15</sup> Age fe di, gogour ĩ awa kurenem, naan odug gen, naan foula fen, are kayau anĩ wal fiye ken, kuwei bun yale irousilauf nigin age fen. <sup>16</sup> Anĩ ere, teneub kayau isenne ken, awa aã ye fen, gogour odug awa kurenem naan odug foula fen anĩ yakasin. <sup>17</sup> Age fe di, gogour odug kayau nigin fatuk bagai name fen, kayau nē ibor tar fau dibodok anidi ganan geid kusīya nigin ilen, idi Negur nē ĩtāfiya dō de fen, Jesus nē biya od dirouf anidi.

## 13

<sup>1</sup> Agef fen, gogour odug maaĩ yerin ifaren.

### *Gaar Kuĩ Maaĩ Namenem Ulō Yesin*

Age fe di, aya gaar kuĩ taka maaĩ namenem ulō yeis mog, ailen. ĩ karat ten ado, mudur sewen ado fen, ĩ yogon karat ten bun teter adodo fen, mudur ganan bun Negur kono fiya nē yana ado.

<sup>2</sup> Gaar kuĩ aya ailen are lepat\* gen, anĩ ere, yogon ye are bea nē ye gegen, agef fen, awa laion nē gen. Gogour odug yogon megeir, yogon king nē sia ado, total odug, gaar kuĩ ifenen. <sup>3</sup> Gaar kuĩ nē mudur taka are dũ di, laa fou fenē gen yenen, anĩ ere, dũ di, laa fou fenē gen yenen are baban biya len. Teneub ganan terē de fen, gaar kuĩ dō difen.

<sup>4</sup> Tamo idi gogour odug yana dalesen, ere nigin, ĩ gaar kuĩ megeir ifenen. Age de fen, idi gaar kuĩg

---

\* **13:2:** Lepat are fus kuĩ odug gen.

yana dales fen, diron, “Aim anĩ gaar kuĩ gen? Aim anĩ ĩ ado kusĩ yalesauf?”

<sup>5</sup> Gaar kuĩ ĩ, yogo seli kulō fiya nē od ado Negur nigin kono fiya nē od wogō youf nigin sigor ifen ken, foti-tu ogō bun kabĩ yalouf nigin megeir ifenen. <sup>6</sup> Gaar kuĩ ĩ Negur kono fiyēf nigin, Negur yana, Negur nē ibodōya modoũ ado, idi saa ilun dibodok anidi bun bou yūya od wogō youf nigin awa kamen. <sup>7</sup> Gaar kuĩ ĩ, Negur nē tamo kayau geid kusĩ de fen, idi wal fediyouf nigin megeir ifenen. Agef fen, ĩ, ibor ganan, tamo kayau ganan, od fire fire ganan ado, teneub ganan nē mudur ibodōf nigin megeir ifenen. <sup>8</sup> Tenebur dibodok anidi ganan gaar kuĩ yana dalesauf, are idi, saa teneub ado kare fen sain bunem isi sain enei bun, idi yeneid Sipsip Naal dukesin anĩ nē mata ibodōya nē buk bun to itoton anidim age difouf.

<sup>9</sup> Taka ĩ weder adouf, utornēg len, ĩ karĩ youf.

<sup>10</sup> Taka ĩ kalabus bun ileyā nigin igirnēf,  
ĩ kalabus bun ilauf.

Taka ĩ dimig nem dukesiyouf nigin igirnēf,  
dimig nem ĩ dukesiyouf.

Enei wō youf sain bun, Negur nē tamo kayau feseya sã totol difar fen, momoiya kafĩ difel dirouwauf.

### *Gaar Kuĩ Teneb Bunem Ulō Yesen*

<sup>11</sup> Anĩ bure fele di, gaar kuĩ taka teneburem ulō yeis mog, ailen. ĩ sipsip naal gen karat uru ado, anĩ ere, ĩ gogour odug gen wogō yedig. <sup>12</sup> ĩ gaar kuĩ uyulil ulō yesin anĩ lof mog, yogon megeir ganan yale fen, kabĩ yalen. Agef fen, ĩ, teneub ado idi tenebur difaref anidi ganan, gaar kuĩ uyulil

ulō yesin, are dū di, laa fou fenē gen yenen anī baban biya len, ī yana dalesauf nigin nugo fedin. <sup>13</sup> Agef fen, ī uris memelik odug inodin, ī tamo kayau lo de mog, age fe di, yā saa ilunem tenebur isin anīg age fen. <sup>14</sup> Ī gaar kuī uyulil ulō yesin anī lof mog, megeir yale fen, memelik inodin nigin, ī tenebur difaref anidi idegnēdin. Ī, gaar kuī, are dimig nem dū di, baban biya len anī yana dalesauf nigin, idi anī nē malakanon dinouf nigin irokenēdin. <sup>15</sup> Ī gaar kuī uyulil ulō yesin anī malakanon mata ifenēya nē megeir ifenen, anī bunem, malakanon are sā wogō yen, ī age fe di, idi malakanon anī yana yaleseyā ditoron anidi ganān didenkesin. <sup>16</sup> Gaar kuī dumen ulō yesin are, tamo kayau ganān, nanaal ado odudug, safina ado ado maleg, kafī fiya sā tamo ado ferfer, uris taka imeid biyalē be, demeid bun dalouf nigin nugo fedin. <sup>17</sup> Age fe di, aibem taka to na yale fen, to na sur fouf, ī gaar kuī nē uris adouf anī dogol, uris are gaar kuī nē yana be, yogo yana nē namba.

<sup>18</sup> Kisi biya adouf are, enei keleī youf. Are taka ī karīya biya adouf, ī utornēg len, gaar kuī nē namba iwesauf, ere nigin, namba are tamo nē. In namba are 666.

## 14

### *Sipsip Naal Ado 144,000 Tamo*

<sup>1</sup> Anī bure fele di, aya lo afen, aya wageun Sipsip Naal Saion Arei bun 144,000, yogon yana ado yogon tama nē yana demeid bun itotoyan anidi, ī geid difaren. <sup>2</sup> Age afe fen, aya ait taka saa

ilunem, naan fatuk wĩ ye fen, gou redig gen ado, kolimei gudũya odug gen karĩ aun. Ait aya karĩ aun are, harp kodẽya tamo harp kodẽ dedig gen. <sup>3</sup> Age de fen, idi, king nẽ sia, ereb mata ibodõya aiwa adodo ado, mudur adodo wagedin seg mata dalen. Aibem taka seg anĩ keleĩya kisi feleya sã, 144,000 idi tenebur tamal kel gei fedin anidim dogol. <sup>4</sup> Eneidi are kayau geid yen ken, amuyẽ inoya sã anidi, ere nigin, idi dogo nigin karẽtut bagai dibodon. Idi Sipsip Naal narib ile di, idi dõ de diyõdig. Idi tamo ganan atun kel geif fen, faat uyulil yũya gen, Negur ado Sipsip Naal bun sesewi fedin. <sup>5</sup> Idi sigoredin idegẽya taka to wõ yen, idi bouweid bun od taka sã.

### *Engel Towo*

<sup>6</sup> Anĩ bure fele di, aya engel taka ilun bagai fatutu ye mog, ailen. Ĩ idi tenebur dibodok anidi, are teneub ganan, ibor ganan, od fire fire ganan ado, tamo kayau ganan bun kurõ fesiyouf nigin, mata ibodkeleya nẽ biya od ado ailen. <sup>7</sup> Ĩ ait odugem iron, “Negur anini wiyẽg fen, ĩ fula fiya medeĩya wenẽg, ere nigin, yogon es fiya nẽ sain mogo isin. Ĩ saa, teneub, maaĩ ado, naan warur inodin anĩ yana waleseg.”

<sup>8</sup> Anĩ dõ fiya engel takam dõ fiye ken, iron, “Ĩ kubũ yen! Babilon Odug kubũ yen, ĩ teneub ganan yogon seseirã tobonunã nẽ wain total ifeneĩd don.”

<sup>9</sup> Anĩ dõ fiya engel takam dõ fiyeĩd fen, ait odugem iron, “Taka ĩ gaar kuĩ ado yogon malakanon yana yales fen, yogon uris dama bun be, ima bun yalouf, <sup>10</sup> ĩg Negur nẽ didi nẽ wain

yāf, are mogo total adok yogon didi nē kap bun fi felen. Ī engel fateul anidi ado Sipsip Naal meleid bun, salfa yā bobo reya bun darau yalouf. <sup>11</sup> Age fe di, dogo neid darau nē yākaau fā ye, gai gai agef ibodkalauf. Idi gaar kuĩ ado yogon malakanon yana dalesedig anidi be, aib taka yogon yana nē uris yalen ĩ, naa be bō, si inoya nē sain sā.” <sup>12</sup> Enei wō youf sain bun, Negur nē tamo kayau, idi Negur nē ĩtāfiya dō de fen, Jesus nigin momoiya dirou kafī difelef anidi, feseya sā megeir difarauf bagai.

<sup>13</sup> Anĩ bure fele di, aya saa ilunem ait taka eig ye mog, karĩ aun, “Utot: Idi sain enei bunem ilauf ganan, Odug bun gare douf are el fediyouf.”

Awa Uurem irok, “Momoi, idi dogo neid kabĩ bun si dinouf, ere nigin, idi ereb age difen are ado dilauf.”

### *Tenebur Saaf Kusu Fiya Sain*

<sup>14</sup> Aya lo afen, aya wageun lalo lalau taka ado, lalo bun ibodon are ‘tamo naal gen,’\* ĩ yogon mudur bun gol teter kurū fen, yogon ima bun dimig gunō waila ado irouf anĩ ailen. <sup>15</sup> Age fe di, engel taka tempel bunem isi fen, ĩ lalo bun ibodon anĩ ait odugem iweig irokenen, “Ogon dimig gunō waila ado wale fen, kokour wo, ere nigin, kokour fiya nē sain mogo isin, tenebur saaf kusu fiya nē are mogo mayol.” <sup>16</sup> Age ye di, lalo bun ibodon ĩ, yogon dimig gunō waila ado tenebur waĩ fe di, tenebur saaf kokour fen.

<sup>17</sup> Engel taka, saa ilun oun tempel bunem isin, ĩg dimig gunō waila ado iroun. <sup>18</sup> Age fe di,

---

\* **14:14:** Daniel 7:13

engel takag, yã lo fedig anĩ alta bunem isi fen, ait odugem ã dimig gunõ waila ado iroun anĩ iweig irokenen, “Ogon dimig gunõ waila ado wale fen, tenebur tamal wain nẽ biya kuru wo, ere nigin, wain biya are mayol.” <sup>19</sup> Engel ã yogon dimig gunõ waila ado anĩ tenebur waif fen, wain biya kuru fen, agef fen, ã Negur nẽ didi nẽ wain asi fiya modoũ odug bun iraran. <sup>20</sup> Wain biya are, taun yerin wain asi fiya modoũ bun asi difen, age dife di, naud wain asi fiya modoũ bunem isin, are 300 kilomita meluk fen, wan ado hap mita ilun.

## 15

### *Engel Sewen Teneub Daũ Fiya Nẽ Sesen Sewen Adodo*

<sup>1</sup> Anĩ bure fele di, aya saa ilun uris odug taka fire bagai ailen. Are engel sewen, idikeleya nẽ teneub daũ fiya nẽ sesen sewen adodo, are idi idikeleya nẽ, ere nigin, idi bunem Negur nẽ didi idikalauf. <sup>2</sup> Age afe fen, aya ereb taka maaĩ galas nem dinon anĩ, yã ado bagu fiya gen ail fen, idi gaar kuĩ, yogon malakanon ado, yogon yana nẽ namba kusĩ bun wal difen anidi, maaĩ yerin difaren anĩ ailen. Idi Negurem harp ifenẽdin anĩ guri de fen, <sup>3</sup> Negur nẽ ferfer, Moses nẽ seg ado, Sipsip Naal nẽ seg dalen:

“Odug Negur saa ilun nẽ kusĩ tamo guri weid uyu uroudig anĩ,

õ agodig anĩ odug fen, mala yũ yaleya.

Teneub ganan nẽ King,

ogon naab are madur fen, momoi bagai.

<sup>4</sup> O Odug, aim anĩ õ to kumĩ yo ken,



ō yanã bun fula fiya medeïya to inouf?  
 Ere nigin, ō dogol fateul.  
 Ogon tobonunã biya madur bagai are yaor won  
 nigin,  
 teneub ganan disi fen,  
 ō wagen yanã dalesauf.”

<sup>5</sup> Anĩ bure fele di, aya lo afe mog, saa ilun oun tempel, Negur nẽ Od Kurŏ Fesiya nẽ Salafat Fateul, are kã fen. <sup>6</sup> Tempel namenem, engel sewen idi teneub daũ fiya nẽ sesen sewen adodo anĩ ulŏ desin. Idi kolos lalau amuyẽ sã, medeïya difoun ken, idi akoreid bun gol let gu difedin. <sup>7</sup> Age dife di, ererb mata ibodōya aiwa adodo takam, gol beĩ sewen Negur mata faimud ibodkeleya nẽ didi isokoseya anĩ, engel sewen ifenẽdin. <sup>8</sup> Age fe di, tempel are, Negur nẽ fula fiya medeïya ado yogon megeir nẽ kaau isokose di, engel sewen neid teneub daũ fiya nẽ sesen sewen anĩ fau bure feleya sã mog, taka nem tempel namen ileya kisi feleya sã.

## 16

### *Beĩ Sewen Negur Nẽ Didi Ado*

<sup>1</sup> Anĩ bure fele di, aya ait odug taka tempel bunem engel sewen irokeneĩd fen, eig ye mog, karĩ aun, “Uleg, beĩ sewen Negur nẽ didi adodo anidi teneub bun fi weleg.” <sup>2</sup> Engel uyulil ile fen, yogon beĩ teneub bun fi fele di, guruma sane darau odug bagai anĩ, tamo kayau gaar kuĩ nẽ uris ado fen, yogon malakanon yana dalesedig anidi bun, wowã yen.

<sup>3</sup> Anĩ dō fiya engel taka, yogon beĩ maaĩ bun fi fele di, maaĩ anĩ laa tamo nē naud gen falei fen, age fe di, ereb ereb maaĩwō mata dibodon ganan gare den.

<sup>4</sup> Anĩ dō fiya engel taka, yogon beĩ, naan odudug ado naan warur anidi bun fi felen, age fe di, naud falei feledin. <sup>5</sup> Age fe di, aya engel naan lo fedig anĩ eig ye mog, karĩ aun:

“Ō gama ubodok, kulu ubodon, ō Fateul Bagai,  
ō madur bagai,  
ere nigin, ō mogo ago es won.

<sup>6</sup> Idi ogon tamo kayau ado ogon profet didenkeis fen, dogo neid naud fi difelen, anĩ nigin, ō idi naud yōya nigin wenēdin, are idi yōya kisin bagai wenēdin.”

<sup>7</sup> Age ye di, aya alta eig ye mog, karĩ aun:

“Momoi, Odug Negur saa ilun nē kusĩ tamo guri weid uyu uroudig anĩ,  
ogon es fiya are, momoi fen madur bagai.”

<sup>8</sup> Anĩ dō fiya engel taka, yogon beĩ gaa bun fi fele di, gaa tamo kayau yā nem ifalegnēdiyof nigin megeir ifenen. <sup>9</sup> Idi uruwa total bagai bunem ifalegnēdi di, idi, Negur teneub daũ fiya nē sesen eneidi lo fedidig anĩ, yana kono difen, age de fen, idi waud falei ye fen, Negur yana yaleseya ditoron.

<sup>10</sup> Anĩ dō fiya engel taka, yogon beĩ gaar kuĩ nē king nē sia bun fi fele di, yogon tano gugum kelen. Tamo idi darau nigin baleid mū de fen, <sup>11</sup> dogo neid darau ado gurumeid nigin, saa ilun nē Negur kono difen. Anĩ ere, idi ereb sane age difen anĩ to ditor ken, waud to falei yen.

<sup>12</sup> Anī dō fiya engel taka, yogon beī Yufretis naan odug bun fi fele di, naan are, gaa iseyan tamal king disiyouf nē naab dodok fiya nigin, gere kelen. <sup>13</sup> Anī bure fele di, aya kaa sesen towo felī gen, idi gogour odug awa kurem, gaar kuī awa kurem ado, idegēya profet awa kurem ulō deis mog, ailen. <sup>14</sup> Idi kaa sesen nē uur anidim memelik nē uris dino fen, idi teneub ganan nē king ganan bun dile fen, Negur saa ilun nē kusī tamo guri feid uyu iroudig anī nē naa odug bun, idi kusī bun guru difouf nigin gou difediyouf.

<sup>15</sup> Jesus irok, “Lo welegei, aya bē tamo gen asiyouf! Taka ī mulaī yenēya sa ken, yogon kolos sirin ado ibodok are, ī el fiyek, ere nigin, ī gemū to ile di, yogon mama to dilouf.”

<sup>16</sup> Age de fen, idi king, Hibru od nem Amagedon dedig nē an guru difouf nigin gou difedin.

<sup>17</sup> Anī dō fiya engel taka, yogon beī ilun owōbē fi fele di, tempel namenem king nē sia bunem ait odug wō ye fen, iron, “Gama mogo bure felef!” <sup>18</sup> Age fe di, kolimei filiya, gurūya odug, kolimei gudūya ado, mimī odug wō yen. Tamo tenebur difar mog, mimī odug age fiya taka to wō yen, mimī are gai odug bagai. <sup>19</sup> Taun odug Babilon are faraf towo fen, agef fen, teneub ganan nē taun daū feledin. Negur ī Babilon Odug nigin weder fokōf fen, kap yogon didi barikā nē wain isokosen anī ifenen. <sup>20</sup> Nuyo ganan sa kele di, areig ilediya kisi feleya sā. <sup>21</sup> Saa ilunem uyē ais ado odug, teke tekelei 50 kilogram age fiya tamo bun kuku ren. Age fe di, idi uyē ais adom daū fedin nigin de fen,

Negur kono difen, ere nigin, daũ fiya are, gai sane bagai.

## 17

### *Kayau Gaar Kuĩ Teten Ibodon*

<sup>1</sup> Engel sewen beĩ sewen adodo anĩ takam isi fen, aya irokanan, “Usi, aya kayau bouwa na sur fedig odug, ĩ naan musei teten ibodōdig anĩ nē kafĩ fiya afelnōf. <sup>2</sup> Tenebur nē king, ĩ geid seseirã tobonunã dino di, tamo kayau tenebur difaref anidi, yogon seseirã tobonunã nē wain bunem, idi meleid waĩ yen.”

<sup>3</sup> Age ye fen, engel ĩ Awa Uur bunem aya gerere tuan yale irouleyan. An aya, kayau, gaar kuĩ giriya, bouwa bun kono fiya yeneid barikã, mudur sewen ado, karat ten anĩ teten ibod mog, ailen. <sup>4</sup> Kayau ĩ, kolos giriya tu releya medeĩa ado giriya bagai ifoun ken, gol, meein meli bagai ado, maaĩ tuwa meli bagai pel naki yen. ĩ gol kap, ninir safineid ado yogon seseirã tobonunã nē sisik isokosen anĩ imam iroun. <sup>5</sup> Waa nē yana are, yogon dama bun ditoton:

#### BABILON ODUG

#### KAYAU BOUWEID NA SUR FIYA ADO

#### TENEBUR NINIR IBODOK ANIDI NEID SINA.

<sup>6</sup> Aya, kayau, Negur nē tamo kayau neid naudeid ado, idi Jesus nē od kurō difesin anidi, nedi naudeid yokon, mala waĩ ye mog, ailen.

Aya kayau anĩ ail fen, fatuk bagai terē aun.

<sup>7</sup> Age afe di, engel aya irokanan, “Ō ere nigin terē wof? Aya, ō, kayau nē waa ado, gaar kuĩ kayau anĩ teten ibodōdig, ĩ mudur sewen ado fen, karat

ten ado anī nē waa anī faded ayōf. <sup>8</sup> Gaar kuī ulen are, kulu ibodon, gama ibodōya sã, agef fen, ī ku isil idīya sã bunem ulō yeis fen, yogo daū falauf bun ilauf. Tamo kayau tenebur dibodok anidi, saa teneub ado kare fen sain bunem isin, idi yeneid mata ibodōya nē buk bun to itoton, idi gaar kuī anī dile fen terē douf, ere nigin, gaar kuī ī kulu ibodon, gama ibodōya sã, agef fen, fau dum isiyouf.

<sup>9</sup> “Enei keleīya nigin, kisi biya adouf. Mudur sewen are, arei mudu sewen kayau teten ibodōdig anī. <sup>10</sup> Idig king sewen anidi. Faif idi kuku ralaisin, taka fau ibodok, taka fau isiya sã. Anī ere, ī isiyouf are, sain naal bagai ibodōf. <sup>11</sup> Gaar kuī kulu ibodon, gama ibodōya sã, are ī namba eit king, ī sewen anidi nē taka, ī yogo daū fiya bun ilauf.

<sup>12</sup> “Karat ten ō ulen are, ten king idi tano fau yaleya sã anidi, anī ere, idi gaar kuī geid, aua tekelei king nē megeir dalouf. <sup>13</sup> Idi kisi tekelei ado fen, dogo neid megeir ado total, gaar kuī difenēf. <sup>14</sup> Idi Sipsip Naal geid kusī douf, anī ere, Sipsip Naal idi kusī bun wal fediyouf, ere nigin, ī odug neid Odug ado king neid King. Idi ī iweignēdin anī, igirnēdin anī, feseya sã dō difen anidi, ī geid difarauf.”

<sup>15</sup> Age ye fen, engel aya irokanan, “Naan, kayau bouwa na sur fedig ī anī teten ibodon, ō ulen are, tamo kayau, guru fiya odug, teneub ganan ado, od fire fire ganan. <sup>16</sup> Karat ten ō ulen ado gaar kuī, idi kayau bouwa na sur fedig anī to orodiyouf. Idi ī daū difiye ken, gemū dinenēf. Idi ī bouwa

dokon, yā nem tō difiyēf. <sup>17</sup> Negur idi neid waud bun kisi anī ino di, idi Negur nē oroya dō difouf nigin, idi kisi tekelei dino fen, dogo neid tano gaar kuī difenēf, age difef dile mog, Negur nē od kisi falauf. <sup>18</sup> Kayau ō ulen are, taun odug, tenebur nē king neid mudur ibodok anī.”

## 18

### *Babilon Narī Fen*

<sup>1</sup> Anī bure fele di, aya engel taka saa ilunem isi mog, ailen. Ī megeir odug ado, age fe di, yogon fula fiya medeīya anim teneub lalan len. <sup>2</sup> Ī ait odugem, total bagai iweig iron:

“Kubū yen! Babilon Odug kubū yen!

Ī, kaa sesen neid fō,  
kaa sesen ganan neid fō ado,  
nina amuyē ado ninir sane to ile oroya ganan  
neid fō falei fen.

<sup>3</sup> Teneub ganan,  
yogon seseirā tobonunā nē wain total don.  
Tenebur nē king, ĩ geid seseirā tobonunā dinon,  
age fe di, tenebur nē bisnis tamo idi, yogon  
safina nigin oroya total ado bunem, safina  
musei dalen.”

<sup>4</sup> Anī bure fele di, aya ait taka saa ilunem eig ye mog, karī aun:

“Neu tamo kayau, ā yogon mosor anī utin to  
walogouf nigin ado,  
ā in mala solo sane taka to walogouf nigin,  
ā ĩ utornēg fen, usig,

<sup>5</sup> ere nigin, yogon mosor mogo mudu ilun isel saa  
ilune di,  
Negur yogon idododin nigin weder fokō yen.

<sup>6</sup> Ī ifenein kilei abag wenēgouf,  
ereb ĩ age fen are, ĩ age fen anĩ ado, taka teten  
unog fen, wenēgouf.

Ereb ĩ yogon kap bun falei fen are, ĩ falei fen  
anĩ ado, taka falei ge fen, teten unogouf.

<sup>7</sup> Ī fula fiya medeīya ado safina meli meli, yogo  
nigin yalen kilei,  
darau ado wau gudū fiya fatuk bagai  
wenēgouf.

Ī yogon wau bun, yogo yana yales fen,  
‘Aya kuin abodok, aya waab sã,  
agef fen, aya to bagai wau gudū fouf,’ yen.

<sup>8</sup> Anĩ nigin, naa taka bun, in daū fiyēya nē sesen ĩ  
bun isiyouf,  
are laa, wau gudū fiya ado, kadir.

Agef fen, ĩ yã bun isaikalauf,  
ere nigin, Odug Negur ĩ es fiyek, ĩ anĩ megeir  
barikã.

<sup>9</sup> “Tenebur nē king idi, ĩ geid seseirã tobonunã  
dino fen, yogon safina meli meli foi difen anidi, ĩ  
isaĩ di, kaau dile fen, idi ĩ nigin waud gudūf fen,  
inã logurouf. <sup>10</sup> Idi in darau yaleya anĩ nigin fatuk  
bagai kumĩ de fen, gerō difar fen, dirōf:

“ ‘Malalon! Malalon, O taun odug,  
O Babilon, taun megeir ado!

Aua tekelei bun, ogon daū fiya mogo isin!’

<sup>11</sup> “Tenebur nē bisnis tamo idi ĩ nigin waud  
gudūf fen, inã logurouf, ere nigin, taka nem idi  
neid safina baban to na yalouf, <sup>12</sup> safina are, gol,  
silwa, meein meli meli ado, maaĩ tuwa meli bagai  
pel; gabar lalau medeīya, gabar giriya tu releya  
medeīya, gabar slika ado, gabar giriya bagai; aa

meli meli fire fire; ereb ereb fire fire elefan karat nem, aa meli meli nem, bras nem, ain nem ado, mambol nem dinodin; <sup>13</sup> sinamon, ye, aa gaula sumeĩ nigin tō fiyadig, moul aa bun tamal sumeĩ biya biya ado, moul biya takag; wain ado oliv moul; flawa ado wit, bulmakau ado sipsip; hos ado karis, ferfer ado tamo mata dibodok.

<sup>14</sup> “Idi dirōf, ‘Ereb ereb yaleya nigin ō oroyon are, mogo sa kelen. Ogon safina musei ado ereb ereb fula fiya medeīya ganan, mogo sa kelen, idi baban to bagai fotou difouf.’ <sup>15</sup> Bisnis tamo safina eneidi na sur dife fen, ī bunem safina musei dalen anidi, yogon darau nigin fatuk bagai kumĩ de fen, gerō difarauf. Idi inā logur fen, waud gudūf fen, <sup>16</sup> diweig dirōf:

“ ‘Malalon! Malalon, O taun odug,  
kolos lalau meli bagai, giriya tu releya medeīya ado, giriya bagai ifoun ken,  
gol, meein meli bagai ado, maaĩ tuwa meli bagai pel naki yen!

<sup>17</sup> Aua tekelei bun dogol, safina odug bagai age fiya daũ felen!’

“Maaĩ bun ulum irouya tamo ganan, idi waag bun diyōdig ganan ado, idi maaĩ bunem dogo neid mata ibodōya nē safina daledig anidi ganan, gerō bagai difarauf. <sup>18</sup> Sain idi ī isaĩ di, kaau dile fen, idi diweig dirōf, ‘Taun odug eig fiya taka tau ibodon?’ <sup>19</sup> Idi aas mudureid bun digu ken, waud gudū fe di, inā logur fen, diweig dirōf:

“ ‘Malalon! Malalon, O taun odug,  
an idi maaĩ bun waag adon ganan,  
yogon safina odug bunem safina musei dalen!



Aua tekelei bun, are daũ felen!

<sup>20</sup> O saa ilun, ã nigin waũ kulĩ ye!

Negur nẽ tamo kayau, aposel ado, profet,  
wauĩ kulĩg!

Ĩ ã age yein kilei, Negur ã es fiyen.’ ”

<sup>21</sup> Age ye fen, engel megeir ado, meein odug wit  
itutuya nẽ age fiya, yale fen, maaĩwõ ira ken, iron:  
“Waila sane eig fiya bunem,

Babilon taun odug agef daũ fe di,  
baban to bagai dilouf.

<sup>22</sup> Harp kodẽya tamo, seg tamo, kelel fĩya tamo  
ado, taur fũya tamo,  
idi neid ailõ õ bun baban to bagai karĩ douf.

Kabĩ fire fire ganan nẽ keleĩ tamo,  
õ bun baban taka to bagai wõ youf.

Wit itutuya nẽ meein ait,  
õ bun baban to bagai karĩ douf.

<sup>23</sup> Lam nẽ lalan õ bun baban to bagai so fouf.

Tamo kayau yalef yalef yeya ait,  
õ bun baban to bagai wõ youf.

Ogon bisnis tamo idi, teneub ganan nẽ tamo odug.  
Õ ogon idegẽya kosẽ bunem, teneub ganan  
udegnẽdin.

<sup>24</sup> Profet, Negur nẽ tamo kayau ado,  
tenebur ein didenkesin anidi ganan neid  
naudeid, ã bun dilen.”

## 19

### *Halleluya!*

<sup>1</sup> Anĩ bure fele di, aya saa ilun tamo kayau guru  
fiya mala odug neid aiteid gou reya gen, karĩ aun:  
“Halleluya!

Kel gei fiya, fula fiya medeĩya ado, megeir are,  
neda Negur nẽ.

<sup>2</sup> Yogon es fiya are, momoi fen madur bagai.

Ĩ kayau bouwa na sur fedig odug,  
ĩ yogon seseirã tobonunã bunem teneub daũ  
fen anĩ, es fiyen.

Ĩ yogon ferfer neid naudeid, anĩ mala solo ĩ bun  
ifenen.”

<sup>3</sup> Idi baban diweig diron:

“Halleluya!

Ĩ bunem kaau faimud gai gai iselauf.”

<sup>4</sup> Mudur adodo tuwenti-fo ado, ereb mata  
ibodõya aiwa adodo, kuku de fen, Negur king nẽ  
sia bun ibodon anĩ yana dalesen. Age de fen, idi  
diweig diron:

“Momoi, Halleluya!”

<sup>5</sup> Age dife di, ait taka, king nẽ sia bunem wõ ye  
fen, iron:

“Ã in ferfer ganan,  
ĩ anini wiyẽgedig,

nanaal ado odudug,  
neda Negur yana waleseg!”

<sup>6</sup> Age ye di, aya guru fiya mala odug aiteid gen  
karĩ aun, are naan fatuk wĩ ye fen, gou redig gen  
ado, kolimei gudũya odug gen, diweig dirõ mog,  
karĩ aun:

“Halleluya!

Ere nigin, neda Odug Negur saa ilun nẽ kusĩ  
tamo guri feid uyu iroudig anĩ, ĩ lo fiya  
nigin king ibodok.

<sup>7</sup> Ada wauda kulĩ ye, wauda al fe fen,  
fula fiya medeĩya tafenẽf!

Ere nigin, Sipsip Naal kayau yaleya nē naa mogo isin,  
 age fe di, yogon kayau mois mogo yogo nigin dodok fen.

<sup>8</sup> Kolos lalau meli bagai, medeīya ado filiya,  
 ī ifonūf nigin ifenen.”

(Kolos lalau meli bagai are, Negur nē tamo kayau neid tobonuneid madur anī.)

<sup>9</sup> Anī bure fele di, engel aya irokanan, “Utot: ‘Idi Sipsip Naal kayau mois ado bagu fiya nē sifa bun ibodōya nigin iweignēdin are, idi el fedif!’ ” Age ye fen, ī tobol fe iron, “Enei are, Negur nē od momoi bagai.”

<sup>10</sup> Age fe di, aya ī yana alesauf nigin, ye gariyan kubū aun. Anī ere, ī aya irokanan, “To ago! Aya, ō ado, ogon turā tar idi Jesus nē wogōya kafī difel dirouf anidi geid, ada in ferfer. Negur yana wales! Ere nigin, Jesus nigin wogōya are, profet od wogōya nē uur anī.”

### *Tamo Hos Lalau Teten Ibodon*

<sup>11</sup> Aya saa ilun kā feleya ifar mog, aya wageun an hos lalau ifar mog, ailen. Tamo anī teten ibodon are, yana ‘Feseya Sā Dō Fiya Biya’ ado ‘Mmoi Bagai’ dedig. Madur bagai bunem, ī es feid fen, kusī yedig. <sup>12</sup> Yogon mala are, yā mala fitotoleya gen, agef fen, yogon mudur bun tetet musei biya. Ī yogo bun yana itotoya taka ado, are aibem taka to keleī, ī yogo dogol. <sup>13</sup> Ī kolos meluk naud bun nu fen anī ifonun. Yogon yana are, Negur nē Od. <sup>14</sup> Saa ilun nē kusī tamo, idi hos lalau tetedin dibodada ken, kolos meli bagai, lalau filiya difoun ken, ī dō difiyen.

15 Ī yogon awa bunem, dimig waila ado, teneub ganan yūf nigin wō yen. “Ī ain manig nem ulum iroukenēdiyof.”\* Ī, Negur saa ilun nē kusī tamo guri feid uyu iroudig anī nē didi totol nē wain asi fiya modoū bun, asi fouf. 16 Ī, yogon kolos meluk bun ado yogon tukuri bun, yana enei itotoya ibodok:

KING NEID KING ADO ODUG NEID ODUG.

17 Age afe fen, aya engel taka gaa bun ifar mog, ailen, ĩ ait odugem ninā ganan ilun fatutu def anidi iweig irokenēdin, “Usig, Negur nē sifa odug bun gurug, 18 agog fen, ā, king bouweid, kusī mudur bouweid, tamo megeir adodo neid bouweid, hos ado hos tetedin dibodadak anidi neid bouweid, tamo kayau ganan, kafī fiya sā tamo ado ferfer, nanaal ado odudug, bouweid wāgauf.”

19 Anī bure fele di, aya, gaar kuī, tenebur nē king ado, dogo neid kusī tamo idi, tamo hos teten ibodon anī, yogon kusī tamo geid weim kusī douf nigin, guru de mog, ailedin. 20 Anī ere, gaar kuī are dale diroun, age de fen, idegēya profet, ĩ memelik nē uris gaar kuī mala bun inodin anīg, gaar kuī ado dale diroun. Uris anidi bunem, ĩ, idi gaar kuī nē uris dalen anidi ado, idi yogon malakanon yana dalesedig anidi idegnēdin. Idi urom mata dibod mog, ku kolili fiya meein salfa yā bobo reya barikā ado bun, gei de diraran.

21 Dogo neid kusī tamo ganan, dimig, tamo hos teten ibodon awa bunem wō yen anim, idenkesin, age fe di, ninā ganan idi neid bouweid dō dō, teid isokosen.

---

\* 19:15: Sam 2:9

## 20

### *Tausen Yar*

<sup>1</sup> Anī bure fele di, aya engel taka saa ilunem, ī ku isil idīya sã nē ki ado, sen odug imam irou fen, isi mog, ailen. <sup>2</sup> Ī gogour odug, gogour kulu tamal bagai, are Devil be Satan dedig anī yale fen, tausen yar ifarauf nigin sen nem ifokelen. <sup>3</sup> Ī ku isil idīya sã bun ira ken, ku katī fel fen, anī teten itāfiya uris inon. Ī tenebur tamo kayau to idegneid mog, tausen yar ilauf nigin age fen. Anī bure fele di, sain tobega dogol ī folō fiyekalauf.

<sup>4</sup> Aya, king nē sia anidi bun, idi es fiya nē megeir ifenēdin anidi dibod mog, ailedin. Age afe fen, aya, dogo neid biya od Jesus nigin wogō den ado, Negur nē od nigin, uleid kokour difedin anidi neid meleidkanon ailen. Idi gaar kuī be, yogon malakanon yana to dales fen, yogon uris demeid bun be, imeid bun to dalen. Idi mata ke de, fã de fen, Kristus geid, lo fiya nigin tausen yar ilauf anī nē mudur dibodon. <sup>5</sup> (Tamo gare den tunī ganan to ke de, fã de mog, tausen yar are bure felen.) Enei are, kel fāya uyulil anī. <sup>6</sup> Idi kel fāya uyulil anī bun ke de, fã den are, idi el feid fen, fateul. Laa uyulil anī dō fiya isif are, idi bun megeir sã. Anī ere, idi Negur nē ado Kristus nē pris dibod ken, tausen yar anī bun, Kristus geid, lo fiya nigin mudur dibodōf.

### *Satan Daū Felen*

<sup>7</sup> Tausen yar anī bure fele di, Satan ī yogon kalabus bun tamal yalelnē di, <sup>8</sup> ī tamo kayau teneub ganan bun idegnēdiyof nigin, teneub idīyan aiwa adodo, are Gog ado Magog bun ile

fen, idi kusĩ bun ileyā nigin gou fediyouf. Idi neid namba are, maaĩ ubun mumul ifaref age fiya. <sup>9</sup>Idi teneub modoũ odug bun dile fen, Negur nē tamo kayau neid modoũ ado, taun Negur anĩ nigin wau laa fedig anĩ salili difen. Anĩ ere, yā saa ilunem isi fen, idi yakur feidlen. <sup>10</sup>Age fe di, Satan idi idegnēdin are, ku kolili fiya meein salfa yā bobo reya ado bun dale diran, gaar kuĩ ado idegēya profet idi ketem mogo an diraran. Idi ganan an sain ganan, bō ado gaa ado, gai gai darau dalouf.

### *Gare Den Anidi Es Fediyouf*

<sup>11</sup>Anĩ bure fele di, aya king nē sia lalau odug ado, taka anĩ teten ibodon anĩ ailen. Teneub ado saa, ĩ mala iran nē waĩf yale di, idi modoũ san. <sup>12</sup>Age fe di, aya, gare den anidi, odudug ado nanaal, sia wagen difaren ado, buk ikoudiya anidig ailedin. Buk takag ikouya ailen are, mata ibodōya nē buk. Gare den anidi, ereb age difen buk bun itoton anĩ kilei, es fedin. <sup>13</sup>Maaĩ bun gare den anidi, maaim ifenēdi di, laa ado Hades, gare de di, idi bun difaren anidi difenēdin. Age fe di, mugu mugu ereb age difen kilei, es fedin. <sup>14</sup>Age fe di, laa ado Hades, ku kolili fiya yā bobo reya ado bun geif iraran. Ku kolili fiya yā bobo reya ado, are laa uyulil isin anĩ dō fiya laa anĩ. <sup>15</sup>Aib taka ĩ, yogon yana mata ibodōya nē buk bun itotoya sã ilen, ĩ ku kolili fiya yā bobo reya ado bun, yale iran.

## 21

### *Jerusalem Mata*

<sup>1</sup> Anĩ bure fele di, aya, saa mata ado teneub mata, ailen. Saa uyulil ado teneub uyulil are waĩf yalen, agef fen, maaĩ baban to ibodon. <sup>2</sup> Aya Taun Fateul, are Jerusalem mata, Negur bun tamal, saa ilunem isi mog, ailen, are kayau mois tamon iley a nigin naki rel fen, dodok fen gen. <sup>3</sup> Age afe fen, aya ait odug king nē sia bunem eig ye mog, karĩ aun, “Gama Negur nē salafat, tamo bun ibodok, age fe di, ĩ idi geid dibodōf. Idi yogon tamo kayau ouf, age fe di, Negur yogo bagai, idi geid dibod ken, idi neid Negur ibodōf. <sup>4</sup> ĩ idi neid meleid bun maruid ganan waĩ falauf. Baban laa, wau gudū fiya, inā yaleya be, darau to ibodōf, ere nigin, ereb ereb tubu nē are, ganan sa kelen.”

<sup>5</sup> ĩ king nē sia bun ibodon are iron, “Aya ereb ereb ganan mata anof!” Age ye fen, ĩ iron, “Enei utot, ere nigin, od eneidi are, agef bagai wō youf nigin momoi bagai.”

<sup>6</sup> ĩ aya irokanan, “Gama mogo bure felen. Aya uyulil ado idikeleya, gariya ado idikeleya. Taka ĩ naan ail fouf, aya ĩ mata ifenēya nē naan warur bun tamal, mala sã, afenē di, yãf. <sup>7</sup> Taka ĩ kusĩ wal fouf, ĩ enei ganan akorouf, age fe di, aya yogon Negure di, ĩ neu kesu ibodōf. <sup>8</sup> Anĩ ere, idi dume dume age difedig, momoiya sã, tobonunã sane bagai dinodig, tamo dukesidig, noli tobonunã dinodig, idegēya bun kosē dedig, idegēya waitou yana dalesedig ado, idegēya tamo ganan, idi neid modoũ are, ku kolili fiya meein salfa yã bobo reya barikã ado bun. Enei are, laa uyulil dō fiya namba tu laa anĩ.”

<sup>9</sup> Engel sewen anĩ taka, beĩ sewen idikeleya nē

sesen barikã teneub daũ fiya nẽ ado anĩ taka, isi fen, aya irokanan, “Usi, aya kayau mois, Sipsip Naal nẽ kayau anĩ afelnõf.” <sup>10</sup> Age ye fen, ĩ aya Awa Uur bunem arei odug ilun bagai anĩ bun irouleya fen, Taun Fateul, Jerusalem, Negur bun tamal saa ilunem isi mog, ifelnan. <sup>11</sup> Taun are, Negur nẽ fula fiya medeĩya anim so fen. Yogon medeĩya are, meein na sur fiya nẽ meli bagai jasper gen, yogon feliya are, galas medeĩya bagai gen. <sup>12</sup> Taun are, yogon garaĩ odug ilun fen, bobog tuwelf ado. Agef fen, engel tuwelf bobog bun difaren. Bobog bun, Israel ibor tuwelf anidi yeneid itoton. <sup>13</sup> Bobog towo gaa iseyan, bobog towo not melẽ, bobog towo saut melẽ, bobog towo gaa ileyen age de difaren. <sup>14</sup> Taun anĩ nẽ garaĩ, gariya tuwelf ado, gariya tuwelf anĩ bun, Sipsip Naal nẽ aposel tuwelf yeneid ado.

<sup>15</sup> Engel aya wogõ fiyan are, ĩ taun, taun nẽ bobog ado, yogon garaĩ sisi fediyouf nigin, sisi fiya nẽ gol tibog iroun. <sup>16</sup> Taun nẽ bagalam ado bogorou kilei kilei inon. Engel are tibog nem taun sisi fe fen, ilen, 2,200 kilomita meluk, yogon bagalam ado yogon ilun areg de anĩ kilei. <sup>17</sup> Engel ĩ, tamo nẽ sisi fiya bunem, taun garaĩ nẽ mugi sisi fen, are 65 mita, areg engel nẽ sisi fiya. <sup>18</sup> Garaĩ are, meein jasper nem inon. Agef fen, taun are gol bagai nem dogol inon, gol feliya are galas medeĩya bagai gen. <sup>19</sup> Taun garaĩ nẽ gariya are, meein meli bagai fire fire nem, naki fen. Gariya uyulil ifaren are jasper nem, anĩ dõ fiya are meein maaĩ gegẽ gen sapaia nem, anĩ dõ fiya are meein kalsedoni nem, anĩ dõ fiya are



meein aarau mata gen emeral nem, <sup>20</sup> anī dō fiya are meein giriya ado lalau sadonikis nem, anī dō fiya are meein giriya konilian nem, anī dō fiya are meein aarau mayo gen krisolait nem, anī dō fiya are meein aarau mata gen beril nem, anī dō fiya are meein aarau mayo gen topas nem, anī dō fiya are meein krispres nem, anī dō fiya are meein haiasin nem, anī dō fiya are meein giriya ametis nem. <sup>21</sup> Bobog tuwelf are maaī tuwa meli bagai pel tuwelf, bobog teke tekelei, maaī tuwa meli bagai pel teke tekelei nem inon. Taun nē naab odug are, galas karētut bagai gen, gol bagai nem dogol inon.

<sup>22</sup> Aya taun an tempel taka to ailen, ere nigin, Odug Negur saa ilun nē kusī tamo guri feid uyu iroudig anī ado Sipsip Naal are, idi anī tempel. <sup>23</sup> Taun are, gaa lalan be, ogō lalan yaleya nigin to yenek, ere nigin, Negur nē fula fiya medeīya anim lalan ifenēdig, agef fen, Sipsip Naal are taun nē lam. <sup>24</sup> Tenebur tamo kayau, taun anī nē lalan bun diyō di, tenebur nē king, nedi fula fiya medeīya, taun anī bun dirousiyouf. <sup>25</sup> Naa taka bun, yogon bobog taka to bagai inolalauf, ere nigin, an bō sāf. <sup>26</sup> Tenebur tamo kayau idi, nedi fula fiya medeīya ado yana odug, taun anī bun dirou disiyouf. <sup>27</sup> Ereb taka amuyē ado an namen to ilauf, agef fen, aib taka mama nē tobonunā age fedig be, idegēdig, īg an to ilauf, anī ere, idi yeneid Sipsip Naal nē mata ibodōya nē buk bun itoton anidi dogol dilauf.

### *Mata Ifenēya Nē Naan Odug*

<sup>1</sup> Anī bure fele di, engel ĩ, aya, naan odug, mata ifenēya nē naan, are karētut galas medeīya bagai gen, Negur nē ado Sipsip Naal nē king nē sia bunem isif anī ifelnan, <sup>2</sup> naan are taun nē naab odug atu isilen. Naan si sitakā, mata ifenēya nē aa difaren, are yar tekelei bun faat yū tuwelf fedig, ogō teke tekelei bun yogon faat yūdig. Agef fen, aa aarau are, tenebur tamo kayau dagi yalelkenēdiya nē. <sup>3</sup> Isisīya taka baban to ibodōf. Negur nē ado Sipsip Naal nē king nē sia are, taun namen ibodōf, age fe di, yogon ferfer idi, in aruna dalouf. <sup>4</sup> Idi in nawa dilouf, age dife di, yogon yana idi demeid bun ibodōf. <sup>5</sup> Baban bō taka to ibodōf. Idi lam nē lalan be, gaa nē lalan nigin, to kisi difouf, ere nigin, Odug Negur idi lalan ifenēdiyof. Age fe di, idi gai gai lo fiya nigin mudur dibodōf. <sup>6</sup> Engel ĩ aya irokanan, “Od eneidi are, agef bagai wō youf nigin momoi bagai. Odug, profet neid uur nē Negur, ĩ ereb mogo wō youf bagai anī yogon ferfer ifelnēdiyof nigin, yogon engel sur fen.”

### *Jesus Mogo Isif*

<sup>7</sup> “Ulef! Aya mogo kaisā bagai asiyou fenē! Taka ĩ profet od buk enei bun ibodok anī dō fef are, ĩ el fiyek.”

<sup>8</sup> Aya, Jon, ayam eneidi karī au fen, ailedin. Sain aya anī karī au fen, ailedin, aya engel aya ifelnan anī, ye gariyan kubū au fen, yana alesauf nigin age afen. <sup>9</sup> Anī ere, ĩ aya irokanan, “To ago! Aya, ō, ogon turā tar profet ado, idi buk enei nē od dō

difef anidi ganan geid, ada in ferfer. Negur yana wales!”

<sup>10</sup> Age ye fen, ï aya irokanan, “Ō buk enei nē profet od anī bun, ïtāfiya uris to uno, ere nigin, sain mogo melsak. <sup>11</sup> Aib ï mosor inof, utornēg len, ï agef mosorei youf. Aib ï sane age fef, utornēg len, ï sane agei foug. Aib ï biya age fef, utornēg len, ï biya agei foug. Aib ï fateul ibodok, utornēg len, ï fateulei youf.”

<sup>12</sup> Jesus irok, “Ulef! Aya mogo kaisā bagai asiyou fenē! Mala solo tamo ifenēdiya nē are yeir, aya bun ibodok, anī nigin, aya, tamo mugu mugu ereb age difen kilei anī afenēdiyof. <sup>13</sup> Aya uyulil ado idikeleya, uyulil nē ado dumen bagai nē, gariya ado idikeleya.

<sup>14</sup> “Idi dogo neid kolos meluk kulo difef, anī bunem, idi mata ifenēya nē aa bun ileya nigin ado, taun nē bobog bunem taun namen ileya nigin kisi feleya, are idi el fedif. <sup>15</sup> Mayarē difaref are, idi gaũ, idi idegēya bunem kosē dedig, noli tobonunā dinodig, tamo dukesidig, idegēya waitou yana dalesedig ado, idi ganan idegēya nigin waud laaf fen, age difedig anidi.

<sup>16</sup> “Aya, Jesus, ayam kurō fesiya od enei sios nigin afeneif nigin, ã bun neu engel sur afen. Aya Dawid nē Warumutei ado Ibor, Bonimeï nē Barisa medeïya.”

<sup>17</sup> Awa Uur ado kayau mois dirok, “Usi!” Aib taka ï karī yef, irōf, “Usi!” Aib taka ï naan ail fef, utornēg len, ï isiyof. Aib taka ï orof, utornēg len, ï mata ifenēya nē naan ege luwa yalouf.

<sup>18</sup> Aya, idi ganan buk enei nē profet od karī def anī, totol bagai arokenēdif: Aibem taka od enei teten ereb taka tobol fouf, Negur ī daū fiya nē sesen buk enei bun itoton anī, ī bun tobol fouf.

<sup>19</sup> Agef fen, aib taka profet od nē buk enei bun od taka yalelauf, Negur ī, mata ifenēya nē aa ado taun fateul, buk enei bun fated fel itoton anidi bun tamal, ī yalelnēf.

<sup>20</sup> Taka ī enei ganan kurō fesif, are irok, “Moi, aya mogo kaisā bagai asiyou fenē.”

Moi. Odug Jesus usi.

<sup>21</sup> Odug Jesus nē wau ifenēya, Negur nē tamo kayau bun ibodōf. Moi.

**Mata Ifeněya Ně Od**  
**The New Testament in the Marik Language of Papua**  
**New Guinea**  
**Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 11 Nov 2022 from source files dated 22 Nov 2019

d7099f9d-3bdf-5620-8eb3-7e6c51cab7ea